

- मुख्यमंत्री भजन लाल शर्मा प्रदेश ने साढे 300 बिलियन डॉलर री अर्थव्यवस्था बणावण सारू शिक्षा, कृषि अर उद्योग हलका मांय आधुनिक तकनीक ऊं बदलाव माथे जोर दियो।
- राष्ट्रपति द्रौपदी मुर्मू एम.एस.एम.ई. ने विकास रो मजबूत तंत्र बताया।
- चिली रो उच्च थर रो नुमाइन्दा मण्डल खेतड़ी कॉपर प्रोजेक्ट रो दौरा कर्यो-दोन्यू देशां रे बीचे खनन हलका मांय तकनीकी आदान-प्रदान अर भेळा सिखावण कार्यक्रम माथे सहमति बणी।
- प्रदेशभर मांय मॉनसून री सक्रियता ऊं बंधां मांय पाणी री चोखी आवक-चम्बल नदी माथे बण्या तीन्यू बंधा लबालब।

000

मुख्यमंत्री भजन लाल शर्मा कह्यो के राज्य सरकार प्रदेश ने साढे 300 बिलियन डॉलर री अर्थव्यवस्था बणावण सारू केई पहल कर री है। ई सारू शिक्षा, कृषि अर उद्योग हलका मांय आधुनिक तकनीक ने काम मांय लेवता केई बदलाव लाया जावे। श्री शर्मा आज मुख्यमंत्री निवास माथे खेती हलका मांय सुधार, नौजवानां ने रोजगार देवण जोग सिखावण अर मल्टीमॉडल लॉजिस्टिक्स पार्क विकसित करण रा बारा मांय व्ही मीटिंग मांय बोल रिया हा। मुख्यमंत्री कह्यो के खेती मांय एआई ने बधावो देवण ऊं ई हलका री चुनौतियां ने दूर करी जा सके है। मुख्यमंत्री नौजवानां ने फ्यूचर रेडी-इण्डस्ट्री रेडी बणावण सारू हुनस सिखावण माथे जोर दियो। वणा अहलकारां ने विश्व थर रा रूजगार देवण जोग सिखावण सारू सगळा जरूरी कदम उठावण रा निर्देश दिया। श्री शर्मा कह्यो के राज्य मांय निवेश मुजब औद्योगिक वातावरण तियार करण सारू असरदार कदम उठाया जावे। औद्योगिक हलका मांय लॉजिस्टिक्स लागत मांय कमी लावण अर कनेक्टिविटी ने बधावो देवण सारू राजस्थान लॉजिस्टिक पॉलिसी 2025 लागू करी ज्यी है।

000

राष्ट्रपति द्रौपदी मुर्मू देश रा आर्थिक विकास सारू मजबूत एम.एस.एम.ई. तंत्र ने जरूरी बताया है। वणा कह्यो के सूक्ष्म, लघु अर मध्यम उद्यम अर्थव्यवस्था रो मजबूत थांबो है। आज नुवी दिल्ली मांय अंतर्राष्ट्रीय एम.एस.एम.ई. दिवस जळसा मांय बोलता वणा कह्यो के ई हलका रो देश रा सकल घरू उत्पाद मांय कोई तीस फीसदी, विनिर्माण हलका मांय 36 फीसदी अर निर्यात मांय 45 फीसदी रो योगदान है। राष्ट्रपति मुर्मू कह्यो के खेती रे पाछे एम.एस.एम.ई. हलको देश मांय सब ऊं बत्ती रूजगार रा मौका पैदा करे है।

000

भारत अर चिली रे बीचे खनन हलका मांय मदद सारू दोन्यू देशा रा नुमाइन्दा री मीटिंग व्ही। चिली री सरकारी खनन कम्पनी कोडलको री टीम आज खेतड़ी कॉपर प्रोजेक्ट रे तैत कोलिहान अर चांदमारी खदानां ने देख्या। दल खदान मांय गहराई ताई जा र खुदायी रा काम री प्रणाली ने देख्या। इण रे पछे दोन्यू देशां रा नुमाइन्दा मण्डल खनन सुरक्षा, पर्यावरणीय प्रबंधन अर संसाधन उपयोग माथे बतळ करी।

खेतड़ी कॉपर कॉम्प्लेक्स रा कैमिकल विंग उपमहाप्रबन्धक जसवंत कुमार राजोरा बतायो के ई दौरान दोन्यू देशां रे बीचे तकनीकी लेण-देण अर भेळा सिखावण कार्यक्रमां माथे सहमति बनी।

000

पैली री केन्द्रीय मंत्री अर भाजपा नेता स्मृति ईरानी आज बीकानेर मांय आपातकाल री 50 वीं वर्षगांठ रे मौके व्हा कार्यक्रम मांय सिरकत करी। जळसा मांय वणा लोकतंत्र सेनानियां रो सन्मान कर्यो। खबरनवीसां साथे बतळ मांय श्रीमती ईरानी कह्यो के आपातकाल रे दौरान अभिव्यक्ति री आजादी छीनीज गयी ही। वणा लोकतंत्र री मजबूती सारू महिलावां री भूमिका ने महताऊ बताया। श्रीमती ईरानी महिलावां रा सामाजिक अर आर्थिक मजबूती माथे जोर दियो।

000

प्रधानमंत्री नरेन्द्र मोदी रो आकाशवाणी ऊं प्रसारित कर्या जावण वाळो मन की बात मासिक कार्यक्रम आवता दीतवार ने व्हेला। आ ई रेडियो कार्यक्रम री 123 वीं कड़ी व्हेला। मन की बात रो प्रसारण संवारा 11 बज्या आकाशवाणी अर दूरदर्शन रा सगळा नेटवर्क माथे प्रसारित व्हेला। साथै ई ओ कार्यक्रम आकाशवाणी समाचार री वेबसाइट, सूचना अर प्रसारण मंत्रालय अर प्रधानमंत्री दफ्तर रायू ट्यूब चैनलां माथे ई मुहैया व्हेला। इण री लाइव स्ट्रीमिंग ओटीटी प्लेटफार्म बेब्ज माथे ई मिलेला।

000

राज्य मांय लारलाएक हफता ऊं सकिय मॉनसून अबै सगळा हलका मांय पूग गयो है। मौसम महकमो आज आज 23 जिलां मांय बिरखा रो अलर्ट काड्यो है। इण रे साथै ई उदयपुर, जयपुर अर भरतपुर संभाग मांय बिरखा री गतिविधियां आवता एक हफता ताई चालता रहवण री आस जतायी है। ई बीच आवता दो दिनां मांय कठेई-कठेई भारी बिरखा ही व्हे सके है। पाली जिला रा रानी, खीमेल, विद्याबाड़ी अर आरे-सारे रा हलका मांय घंटाभर मूसलाधार बिरखा व्ही। करौली, धौलपुर, झालावाड़, जैसलमेर अर आरे-सारे रा हलका मांय हळका ऊं मझला दर्जा री बिरखा व्ही। बारां रा केलवाड़ा मांय ई जोरदार बिरखा रा समचार है।

राजधानी जयपुर मांय ई गुजरी रात रूक-रूक ने बिरखा रो दौर चाल्यो। बूंदी, बारां, झालावाड़, चित्तौडगढ़, उदयपुर, कोटा, भीलवाड़ा, टोंक, करौली, सिराही, प्रतापगढ़ मांय ई 1-1 सेंटीमीटर बिरखा दर्ज व्ही। लारला चौबीस घंटां मांय सब ऊं बत्ती 13 सेंटीमीटर बिरखा बांसवाड़ा रा सज्जनगढ़ मांय व्ही। जिला रा सल्लोपाट, वेजा, अरथूना, कुशलगढ़ मांय ई झमाझम बिरखा व्ही। इण रे अलावा डूंगरपुर, बारां, दौसा अर जयपुर रा जमवारामगढ़ मांय ई 6 सेंटीमीटर ऊं बत्ती पाणी बरस्यो। चोखी बिरखा ऊं बंधां मांय पाणी री आवक बण्योड़ी है। कोटा ऊं म्हाणा खबरनवीस बतायो के कोटा बैराज अर जवाहर सागर अर राणा सागर बंधा समेत दूजा छोटो-मोटा बंधा मांय बिरखा रो सिलसिलो बण्योड़ो है। जून मीना मांय चम्बल नदी माथे बण्या तीनू बंधा लबालव व्हे गया है।

000

बीसलपुर बंधा रो जल थर आज तीजे दिन ई बध्यो अर ओ 312 दशमलव 57 आरएल मीटर ताई पूग गयो है।

000

उदयपुर मांय आरएनटी मेडिकल कॉलेज मांय लारला दिनां करंट लागण ऊं व्ही एक डॉक्टर री मौत रा मामला ने ले र अजमेर रा जे.एल.एन. अस्पताल रा रेजीडेंट डॉक्टर आज तीजे दिन ई काम रो बहिष्कार कर्यो। अजमेर रा राजस्थान मेडिकल कॉलेज टीचर्स एसोसिएशन रा अध्यक्ष डॉ. संजीव महेश्वरी राज्य सरकार ऊं मामला री निष्पक्ष जांच करावण अर पीड़ित परिवार ने मदद देवण री मांग करी।

000

मुख्य निर्वाचन अहलकार नवीन महाजन कह्यो के नुवा मतदातावां ने जोड़ण अर वां मांय जाग जगावण सारू कॉलेजा मांय इलेक्टोरल लिटरेसी क्लब्स री सक्रिय भूमिका तैय करी जावे। श्री महाजन आज जयपुर मांय सुलभ चुनाव माथे राज्य संचालन समिति री मीटिंग मांय बोल रिया हा। वणा चिकित्सा, सामाजिक न्याय, उच्च शिक्षा समेत दूजा मेहकमां ने आप री वेबसाइट माथे वोटर रजिस्ट्रेशन पोर्टल रो लिंक जरूरी रूप ऊं दरसावण रा निर्देश दिया। श्री महाजन कह्यो के इण रे साथै ई महकमा कानी ऊं रहवासियां ऊं मिलण वाळी अर्जियां मांय मतदाता पंजीकरण रा बारा मांय विकल्प ई खास तौर ऊं भेळो कर्यो जावे। चुनाव आयोग री 'नो वोटर लेफ्ट बिहाइंड' पहल रे तैत 18 साल पूरा कर चुक्या पात्र रहवासियां ने मतदाता रा रूप मांय जोड़ण सारू राज्य चुनाव मेहकमां कानी ऊं बरोबर कोशिश करी जावे।

000

ओडिशा रा पुरी मांय भगवान जगन्नाथ री दुनियाभर मांय नामी सालाना रथ यात्रा आज ऊं सरू व्हे री है। इण मांय हिस्सो लेवण सारू देश-विदेश ऊं लाखू सिरधालू पूग्या है। भगवान जगन्नाथ, भगवान बलभद्र अर देवी सुभद्रा री शोभायात्रा आज संवारे भक्तिभाव अर उमाव रे साथे निकाली ज्यी। इण मांय पुजारियां कानी ऊं देवतावां रा विग्रह ने जगन्नाथ मंदिर गर्भगृह ऊं वां रा राजसी रथां ताई लायी ज्या। पुरी री तर्ज माथे प्रदेश मांय ई भगवान जगन्नाथ री रथ यात्रा रा आयोजन व्हे रह्या है। कोटा रा जगन्नाथ मिन्दरां मांय अभिषेक अर पूजन कार्यक्रम करी ज्या। वठे ई चित्तौडगढ़ मांय निकाली जाय री रथ यात्रा मांय 56 भोग अर नांच प्रस्तुतियां आकर्षण रो केन्द्र बणी है। राजधानी जयपुर रा गोविंद देवजी मंदिर मांय ई रथ यात्रा महोत्सव व्ह्यो। कार्यक्रम मांय घणी तादाद मांय सिरधालू मौजूद रह्या।

000

युवा मामला अर खेल मंत्रालय नौजवानां सारू डिजिटल सेवावां ने सरल बणावण सारू माय भारत पोर्टल और व्हट्सएप रो एकीकरण सरू कर दियो है। व्हॉट्सएप चैटबॉट अबे माय भारत पोर्टल माथे मौजूद है। ई सुविधा ने सीधा व्हट्सएप नंबर 7-2-8-9-0-0-1-5-1-5 री मार्फत ली जा सके है।

000

अंतर्राष्ट्रीय क्रिकेट परिषद-आई.सी.सी. ट्वेंटी-ट्वेंटी मैचां सारू नुवां पावर-प्ले नियमां रो ऐलाण कर्यो है। आवता म्हीना ऊं लागू होवण वाळां आं नियमां मुजब बिरखा खराब रोशनी अर दूजा कारणां ऊं 8 ओवर ताई रा करी ज्या मैच मांय अबै पावर-प्ले 2 ओवर अर दो गेंद रो व्हेला। 30 गज रा घेरा रे बारे फगत दो खिलाड़ी मौजूद रह सकेलो। इणी तरह, पांच ओवर री पारी सारू डेढ़ ओवर पावर-प्ले व्हेला। 10 ओवर री पारी मांय तीन ओवर अर 15 ओवर री पारी सारू साढ़े चार ओवर पावर-प्ले सारू तैय करी ज्या है।